

Nunat Aqqinik Aalajangiisartut marlunngornermi septembarip ulluisa
aqqarnanni 2001, nal. 09.00 ataatsimiinerannit imaqarniliaq

Peqataasut: Miilu Lars Lund, Mariane Petersen, Alibak Steenholdt, Carl Chr. Olsen, allatsigalugu Kristine Olsvig. Emanuel Rosing peqataangilaq.

Oqaluuserisat:

1. Oqaluuserisassat qulequtaannik akuersineq.
2. Kingullermik ataatsimiinerup imaqarniliornerata akuerisassanngorlugu saqqummiunnera.
3. *Kap Windstedt* (nangitaq).
4. Nunatsinni illoqarfiit nunaqarfiillu aqqisa nalunaarsorneqarnerat (nangitaq).
5. Nunap immikkoortui.
6. Kangerlussuarmi nunat aqqi aamma aqqusinernik allagartalersuineq.
7. Taasariaqartut allat.

- 1 pillugu -

Oqaluuserisassat qulequtaat akuerineqarput.


- 2 pillugu -

Imaqarniliaq akuerineqarpoq.

- 3 pillugu -

MLL.: Katersugaasivimmit siunnersuutigineqartoq *Kap Windstedt* itigartitsissutigisariaqarpoq, nunap pineqartup atitoqaa atortittariaqarmat.

CCO.: Katersugaasivimmiut nalunaarfigineqartariaqarput atitoqqat ataqqillugit atussagaat.



MP.: Siunnersuuteqartut nalunaarfigineqarsinnaapput suliarfik kisiat *Kap Windstedt*-imik
atsissagaat.

MLL.: Nunap Aqqi **Ammaartalik Pullassuaq**-llu erseqqissaavigalugit aalajangiunnerat
allakkiarineqassaaq.

Qupp. 2

- 4 pillugu -


MLL.: Nunatsinni illoqarfiit nunaqarfiillu aqqisa nalunaarsorneqarnerata nutarterneqarnera KNR-
imi sulisunut nalunaarutigineqassaaq.

CCO.: Danmarkimi pisortat ilanngullugit nalunaarfigineqartariaqarput pisortatigoortumik
"Ittoqqortoormiit"-mik taasisarneq kukkunerusoq, eqqortumillu taaguutaa ilisimatitsissutigalugu.

Kommuneqarfiit pillugit taaseriaatsit eqqarsaatigalugit siunnersuutigaa taaguut **kommuneqarfik**
illoqarfiit aqqinut siullinngorlugu inissinneqassasoq, taamaalilluni illoqarfiit aqqi erseqqissumik
uiguuserneqaratillu taaneqartalissammata. Maannamut taaseriaaseq, assersuutigalugu: Nuup
Kommunia, nunani allamiut paasiuminaatsittarpaat Nuuk-mik imaluunniit Nuup-mik illoqarfik
ateqarnersoq. Tamanna paatsuungassut qaangerneqarsinnaavoq taaguut **kommuneqarfik**
siullinngortinneqarpat, assersuutigalugu: Kommuneqarfik Nuuk. Siunnersuut akuerineqarpat
atortussanngortinneqarnissaa ukiunik marlunnik sioqqutsilluni pisortanut inuiaqatigiinnullu
ilisimatitsissutaareersinnaavoq.

MLL.: Atitoqqat ataqqineqartussaapput, atissatut siunnersuutit nutaat
isumaqatigiinniutaasussaapput. Sungiussiinnarsimaneq tunngavigalugu atortussanngortitsisarneq
tunngavissaananilu akuersaagassaanngilaq.

AS.: Ukiulluunniit arlallit qaangiussimagaluarpata, kukkusumik aternik atuisut
uppernarsarneqarsinnaasut uparuarneqartariaqarput.



- 5 pillugu -

MLL.: Tunumiut "tunumiutut" taaneqartarnerminnut assuarinninnerat Nunat Aqqinik Aalajangiisartunit qanoq iliuuseqarfigineqassava?

MP.: Ataatsimiinnerni Nunat Aqqinik Aalajangiisartut arlaleriarlutik tamanna eqqartortarpaat unalu aalajangiussimallugu, qangarsuarli nunap immikkoortua *Tunu*-mik taaneqartartoq, taamaattumillu inui *Tunumiut*-nik taaneqartartut.

Qupp. 3

CCO.: Tunumiut pisortaat aperineqartariaqarput tumumiunik taaneqartarnertik namminneq qanoq isumaqarfigineraat. Tamatuma kingorna Nunat Aqqinik Aalajangiisartut taaguut naliliiffigiumaarpaat.


AS.: Tunumiutut taaneqartarnertik ajuallannartutut isumaqarfigissappassuk tupinnarpoq. Taaguut qangarsuarli atuuppoq. Ajuallatsitsiniutitut pinnani nunap aggorneranut taaguutaavoq.

MP.: Eqqaamasat malillugit siornatigut kommunalbestyrelse naammagittaalliummik Nunat Aqqinik Aalajangiisartunut apuussaqaarpoq. Kingornali ima pisoqaqqinngimmat pitsaanerutippaa pisoq nipangiutiinnaraanni.

CCO.: Taaguummut assuarinnittut ilumoorullugu assuarinnikkunik allakkatigut tunngavilersorluakkamik saaffiginnittariaqarput.

- 6 pillugu -

CCO.: Kangerlussuaq sakkutooqaarfiujunnaarmat amerikamiut taaguusersuutaat atorunnaarlugit qanga aqqit uterteqqinneqarsinnaanerat atortinniarlugu Sisimiut kommunianut allakkatigut



siunnersuumi siunertarineqarpoq. Atitoqqat atortilernissaat piinnarnagu aamma aqqusinerni allagartat Kangerlussuarmi kalaallisoortaqanngivissormata, tamakku pissutsit iluarsisariaqarput.


MP.: Sisimiut kommunianut saaffiginnissuteqarnissaq ilalersorpaa.

AS.: Nunat Aqqinik Aalajangiisartut malittarisassaanni allassimavoq: "-aqqusernit illoqannginnersallu kisiisa pinnagit" aternik aalajangersaasinnaasut. Taamaattumik Kangerlussuup iluani pissutsit Nunat Aqqinik Aalajangiisartut akuliuffigisinnaanngilaat. Malittarisassami aamma allassimavoq: "-pisortat nunat aqqi pillugit ilitersortassallugit". Taanna tunngavigalugu Nunaqarfimmi Aqutsisut eqqartukkamut aalajangiisussatut siunnersussallugit qaninnerpaapput. Kristoffer Heilmanniugaluup suliai aamma matumani utaqqeqqaartariaqarsorai. Siunnersuutitut allakkiami oqaatsit atorineqartut pisortaqarfimmut saqqummiutissallugit sualuppallaaqaat. Allakkat taakku akuerineqarlutik nassiunneqassappata oqaasertaasa ilaat allangorteqqaartariaqarput.

Qupp. 4

CCO.: Malittarisassami illoqannginnersat aqqusernillu pineqarmata, siunnersuusialu Sisimiut Kommunianut allagaavoq. Kangerlussuaq sakkutooqarfiujunnaareeraluartoq atitoqqat ataqqinngivillugit maannamut amerikamiut atsiussaata atorineqarput. Nunat Aqqinik Aalajangiisartut malittarisassaata § 1 erseqqissarlugu allakkamut ilanngunneqassaaq, nuutsinneralu Kangerlussuarmi Nunaqarfimmi Aqutsisunut ingerlatinneqassalluni. Toqqaannartumik Kangerlussuarmi Nunaqarfimmi Aqutsisunut siunnersuutit nassiunneqannginnissaa peqquteqarpoq aamma takornariaqarnermik sullissisut matumani ilisimatinneqarnissaat eqqarsaatigineqarmat, taamaattumik saaffiginnissut Sisimiut kommunianut ingerlaqqaartariaqarpoq. Kristoffer Heilmanniugaluup suliaanun tunngatillugu ilisimavaa suliat taakku Sisimiut kommunianut oqqunneqarsimasut, tamatumali kingorna ilisimaneqanngilaq suliat taakku suneqassanersut.

MP.: Siunnersuut suleqatiginnikkusussusermik nipilimmik "assammik isaassinertullusooq" isigalugu naleqquppoq. Taamaallaat oqaasertaasa ilaat AS-ip CCO-illu peqatigiillutik aqqissuutissavaat, kingornalu siunnersuut nassiunneqassaaq.



MLL.: Nuuk illoqarfittut sanaartorfigineqarnerata tiffarteraluttuinnarnera eqqarsaatigalugu Nuup kommunia aamma taamak ittumik siunnersuummik saaffigissallugu piukkunnarpoq, assersuutigalugu atitoqqanik nalunaarsuinikkut kommunimit najoqqutarineqarsinnaasumik.

MP.: Nuup kommunianut siunnersuutissaq immikkut eqqartugassaassaaq, taamaattumik siunnersuutigaa tullianik ataatsimiinnissamut immikkut eqqartugassatut qulequtassanut ilanngunneqassasoq.

Ataatsimiinnissaq tulleeq qaqugu piumaarnersoq erseqqinnerusumik kingusinnerusukkut nalunaarutigineqassaaq.

Miilu Lars Lund
Siulittaasoq

Kristine Olsvig
Allatsi